



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Brazil indang Copa America squad nung Neymar mali

BJP-i aniba NDA-i menden 230 dak tali mangutsü: Arvind Kejriwal

VOL. XXI ISSUE NO. 209 (ADOK 209) DIMAPUR AMUNGNÜ (SUNDAY) MONUPII (MAY) 12, 2024 ₹ 5.00

Congress-i menden 50-a mangutsü, opposition jenjanga mangutsü: PM Modi

Phulbani, Monupii/May 11 (Agencies): Lok Sabha elections nung Congress-i menden 50-a mangutsü aser election sülen opposition party jenjanga mangutsü, ta Ato Kilonser Narendra Modi-i Honibarnü ashi.

Kandhamal aser Bolangir Lok Sabha menden tem atema election nübuyim sentong nung jembidang, Odisha indang 'asmita' (konang) lendong nung lir aser BJP-i aji kumzüka ayutsü aser state nung saffron party ajanga "double engine" sorkar ka kumtetsü aser Odia oshi aser sobaliba angateter jabaso mesüra jala ka chief minister akumtsü, ta PM Modi-i ashi.

Tate nung ali rongsen talopusa liaka nüburtem makamait tia nung yutsüba atema pai BJD atsüngdoksü ayongzüka liasü.

"Lok Sabha nung opposition akumtsü atema Congress-i menden shilem 10-a mangutsü. Parnoki menden 50-a mangutsü," ta PM Modi-i ashi.

Rahul Gandhi den athishir amai

jembidang, "Congress 'shehzade' ya 2014 polls nungi o zülü kasa dang zünga arur... ni ashiba temulung nung zülüoka yuang, NDA ajanga records ajak raksatsü aser menden 400 dak tema angutsü," ta pai ashi.

Atal Bihari Vajpayee kübok Centre nung taoba BJP sorkari takok anguba bilemteta jembidang, küm 26 jakdang tanü anogo ya Pokhran tests ajanga alima nung asen linük noksa tajungba kumdaksü, ta pai ashi.

Nüburtemi küm 500 ataba tembangja par sorkari Ayodhya nung Ram temple yanglu, ta ashi. "BJP-i Odisha nungi tribal jala ka India tir kumdaksü, shiba armed forces nung commander-in-chief lir," ta PM Modi-i ashi.

State nung BJD sorkar aija jembidang, Odisha ya takar state ka lir saka nübur timba sensaker lir, ta pai ashi.

"Iba tia yokba nüburtem state nung yimsüsüba menden nungi atsüngdoksüla," ta paisa ashi.

Aibelener nem tapet temerenshi agüjang: SYO

Dimapur, Monupii/May 11 (TYO): Samziuram village nungi Kainto Yepthomi-i par jala dak tashiyim amshia mapa tamajung inyakba tematiba jenjang nung aitsü, ta Sumi Youth Organization (SYO) sangdong ka ajanga ashi.

Iba amala yimya tamajung kanga süoki ia agizüker aser talisa tebu kati pei jala dak iba ama mapa inyakba ya khenyongi magizükteter, ta SYO ajanga ashi.

Iba amala inyakshangshi ya züba-züba magizükteter, aser temulung ajak agi aitsütsü tangatetba nung nokdaka lir. Civilized society ka nung iba ama ashikülak mapa tamajung inyaker alitsü tesem kecha mali, ta sangdong ajanga ashi.

Asenok rongnunga tashi maiter asohi ochi obendang, akumtsübotep aser temeim sayutsü asenok ajak mapa lir. SYO-i ochi ozü dak tamang akar aser ozüng amshirtemi tasü ita aser jeret-pereta iba ken o süoki ia bushisüngdang aibelener nem ozüng agi melaba ama ochi obendang agütsütsü ayongzüker, ta sangdong ajanga ashi.

Asenok ajaki nisung kija shia temeden asoshi inyaktsüla aser akumtsüboba, sako aser aibelener nem khenyongi tatok magütsüba yimya sübatsüla, ta SYO ajanga ayongzüker.

Iba tia maka tatalokba yagi asenok ajak arok khuret lir ta angatetti, ta ashi.

Manipur mozüki ka nung bomb ka ngutet

Imphal, Monupii/May 11 (Agencies): Honibarnü Manipur state kübok Imphal East nung aliba Saina Institute of Medical Sciences mozüki indang reception desk nung bomb ka nguteta liasü.

Iba bomb timtem majurui indoktsü atema bomb disposal experts tem aru aser iba mapang mozüki ketdangsur aser shirangertem mozüki nungi anizüker oa liasü.

Mozüki nung temulung melemteti talep ya yuka lir ta police nem anepdang 10:30 ako meta osang agütsü, ta ketdangsur kati ashi.

Iba sülen Manipur police bomb detection and disposal squad kanga kera arua

bushisüngdangba mapang iba oset ya hand grenade ka plastic bag sentsü tanak ka nung aleper liasü, ta ketdangsurü ashi.

Taoba mapanga kasa tesem nungya mejangjatetba telungpur telok kati mozüki nungi sen meshia grenade ka yuja liasü.

Iba institute ya Porompat police station aser Jawaharlal Nehru Institute of Medical Sciences tsüngta lir aser tashiyim amshia senotsü meshir asoshi target ka kumogo.

Tia kaa bomb disposal squad ajanga iba tapoktsü oset ya takok ngua raksa indok. Iba dak sendakba nung Manipur police-i ken o ka benoka bushisüngdangba mapang lir.

Tetsürtem ya temelenshi bener arutsürtem lir: Sano Vamuzo



Honibarnü Dimapur Airport nung Nagaland nungi Padma Shri Award 2024 angur Sano Vamuzo agizükdang tangokba noksa. (Dimapur, May 11, 2024)

Kohima, Monupii/May 11 (TYO): Padma Shri Award 2024 angur Sano Vamuzo Honibarnü Dimapur Airport tonga aruba mapang temulungertem, kinunger aser lokti tentet balalai la tushia agizüka liasü.

Sano Vamuzo ya Nagaland nungi social worker aser educationist ka lir, aser Hokulbarnü Rashtrapati Bhavan, New Delhi nung Civil Investiture Ceremony alidang India Tir Droupadi Murmu-i la nem Padma Shri Award agüja liasü.

Osangbener tem den jembidang, kati ka dak nungi angazüksü tongtipang aser asen jakdang aliba tayongzükbatem

agizüktetsüla, ta Sano-i ashi. Lai tanur-tain tetsür ajunga dang pei kibong, kin aser lokti asoshi mapa tajung inyaktsü ayongzüker.

Tetsürtem ya tebilemtsü adokdaksür masü saka temelenshi tajung arudaksür lir, anungji saksalema teyari agütsür ka-ka asütsüla, ta ashi.

Lai takok anguba nung taintemi yariba shilem tuluka lir ta lai ashi aser tetsütem aser tetsürtem dang pei kin tenzüksü ajungshia liasü.

Sano-i Naga Mothers Association tenzükba aser association ajanga inyakba mapa indang rateta jembidang iba ya ajanga region nung tesunep aser

telungjem tali ajungketer, ta ashi. Sano-isa yimtenren tsütsü telungjem maliba aser kin tsüngta tangatetba balala aliba indang kemia liasü aser tesunep, telungjem aser tangatetep nung alitsü ayongzüker.

Kati ka nem tatok agütsütetsüla aser temeim alitsüla, ta lai ashi.

Lai tetsütem dang pei kibong mezüng südaksütsü saka lokti nunga shilem tajung agütsüla, ta ashi.

Tanurtem ya lokti asoshi rongsen amai lir, anungji tetoktepba lima nung parnok lenmang shidak nung anitsü nüngdaker, ta Sano-isa shisem.

Meghalaya indang DGP inyaktsü Idashisha Nongrang shimogo



Senior IPS officer Idashisha Nongrang Meghalaya DGP Lajja Ram Bishnoi

Shillong, Monupii/May 11 (Agencies): Senior IPS officer Idashisha Nongrang ya Meghalaya indang Director General of Police inyaktsü shimogo, ta ketdangsurtemi Hokulbarnü ashi, koba state nungi tetsür DGP mezüngbuba alitsü.

Lai LR Bishnoi melentsü, shiba May 19 nü mapa nungi anisüngzüker angutsü lir, ta ashi.

Chief Minister Conrad K Sangma-i anir Meghalaya Security Commission ajanga Nongrang ya shimteta liasü. Meghalaya nung police tekolakba mapa inyaktsü atema UPSC ajanga taoba ita officer asem nisungi ka shimtsü mela liasü.

UPSC ajanga tenüng agütsüba tanüngba officer ana ya RP Meena aser Deepak Kumar.

Indian Police Service (IPS) officers GP Singh (1991 batch) aser Harmeet Singh (1992 batch) nati iba mapa inyaktsü mulunga maliba indang commission nem osang agütsüba par asem nungi ka shimtsü metetdakja liasü.

"DGP tasenba ama Idashisha Nongrang, IPS shimba atema la nem tenüngsang agütsür. Otsü tasen yanglua asen state nungi tribal tsüri iba jenjang tongtetba la mezüngbuba alitsü, koba asenok ajak asoshi tejak tentetba mapang lir. La asoshi tajungtiba moatsür!" ta CM Sangma-i ashi.

Nongrang ya tang Meghalaya nung Director General of Civil Defence and Home Guard teinyakdak lir aser taoba mapang la acting DGP inyakba lir.

DGP ama la kümsük ya küm ana atema lir aser May 20, 2024

nungi May 19, 2026 tashi inyaktsü. Kasa mapang Meghalaya indang DGP Lajja Ram Bishnoi-i pa indang official gari ama amshiba multi-utility van nung taila number plate amshi ta tai tonglokja lir.

Suspend süa aliba Meghalaya police officer ka nungi iba taitüsü ken o ya aru.

GK Iangrai, shiba 2004 batch Meghalaya Police Service (MPS) officer lir, pai senotsü meshidaki amshi ta tai tonglokja aliba dak sendakba nung tang suspend nung lir aser pai DGP anema ken o ya Sadar police station nung benok.

Meghalaya DGP Lajja Ram Bishnoi-i taila number plate aliba gari ka amshi ta tai tonglokja ken o benoka aliba dak sendakba nung ozüng-i tapet mera agütsü, ta Deputy Chief Minister in-charge Home (Police) Prestone Tynsong-i Hokulbarnü shia liasü.

"Taila number plate ka dak sendakba nung FIR ya yashi nikongdang aru. Anungji ken o ka benoka bushisüngdang tenzükogo. Anungji mapang agüjang, bushisüngdang tenzükdakjang aser iba sülen ozüng nem tapet mera agidakjang," ta Tynsong-i osangbener dang ashi.

DGP Bishnoi yagi pa indang official gari ama registration number ML-02-A-0001 aliba

National Lok Adalat 2buba Quarter district balala nung agiogo



Dimapur, Monupii/May 11 (TYO): National Lok Adalat 2buba quarter May 11 nü state kübok district ajak nung Nagaland State Legal Services Authority tawabangba kübok District Legal Services Authorities-i achaayanga agiogo. District headquarters ajak nung sitting 11 liasü aser ken o 463 benoka liasü.

Ken o 463 nungi pre litigation aser pending stage nung aliba ken o 223 bentettsüogo. Total settlement amount sen 3,17,44,813 dang liasü. Ken o bentettsübatem ya timba Bank recovery, telephone bills, MACT cases amala civil ken o tem dang liasü.

Lok Adalat ya dispute redressal mechanisms tanga ka lir, aser idaki ken o balala okadak bangdaka aliba pre-litigation stage nung aliba tem bentettsür. Legal Services Authorities Act, 1987 kübok Lok Adalats nem statutory status agütsüogo.

Honibarnü Mokokchung DLSA-i ayongzüka National Lok Adalat District Court nung agiogo aser secretary, Mokokchung DLSA Julian Sitlhou presiding officer liasü. Watitemjen, Chubarenla, Tajungla aser Limanungsang nung conciliators liasü. Ajak senteper ken o 19 benok aser

ken o 11 bentetja liasü. Total settlement amount 16,14,718 liasü.

Dimapur nunga National Lok Adalat ya District Court Complex nung agiogo, kong ken o 102 benok aser item ken o tem rongnung 97 Pre litigation aser 5 litigation stage nung liasü. ken o ajak senteper 100 bentettsüogo. Dimapur nung total settlement amount 1,82,87,205 liasü.

Linük ajunga den külemi Kohima nunga National Lok Adalat ya District Court Complex Kohima nung agiogo. Duvelu Vero NJS, Chairman Kohima DLSA & Principal District & Sessions Judge Kohima presiding officer liasü aser obendangertem conciliators tem liasü. Ajak senteper pre-litigation bank recovery, PHE(water bill), telephone ken o 100 aser pending bank recovery ken o 3 benok aser pre-litigation ken o 24 bentettsüogo. Total settlement amount sen 17,367,11 liasü.

Maneni Kiphire nunga Secretary Holika Sukhalu presiding officer sür ken o 7 benok aser 6 bentettsüogo aser settlement amount sen 3,83,095 liasü. Longleng District Legal Services Authority-ia conference hall, District Court Longleng nung

Lok Adalat ayongzüka agiogo, kong ken o pezü benok aser pezüprongla bentettsüogo aser total settlement amount sen 2,65,990 liasü.

Wokha nung 2buba Quarterly National Lok Adalat ya District Court Complex nung agi. Ajak senteper SBI, Nagaland Rural Bank, Central Bank & Co-operative Bank indang Pre Litigation bank recovery ken o 15 benok aser ken o ajak bentettsüogo. Settlement amount ajak agi sen 6,94,436 liasü.

Zunheboto nunga National Lok Adalat ya District Court Complex, Zunheboto nung agiogo.

Cheliam Khamniungan, JMFC/Secretary, Zunheboto DLSA presiding officer aser Easter H Yepthomi o Inolito K Sumi na Conciliators liasü. Ken o ajak senteper trok benoka bentettsüogo. Tuensang nunga bank recovery ken o 137 benok aser ken o 12 bentettsüogo aser Phek DLSA-ia Pre-litigation bank recovery ken o 29 benoka bentettsüogo.

Peren nung ajak senteper ken o 6 benoka bentettsü aser total settlement amount 45,60000 liasü aser Mon nung ken o 35 benok aser ken o 10 bentettsüogo. Settlement amount sen 6,58905 liasü.

AR-i Kohima nung lecture ka ayongzüka agi

Dimapur, Monupii/May 11 (TYO): Mother's amungtsü anogo ka lia May 11 nü Assam Rifles-i tanurtem atema medical health checkup aser sepaitem aser parnok kinungetem atema lecture ka ayongzüka agiogo.

Tanur densema kibong 81-iba sentong nung shilem agia liasü.

Naga Hospital Kohima nungi paediatrician, Dr Pratharan den Assam Rifles medical officer

temi tanurtem temang tendanga anepaluja liasü.

Kasa mapang nung "importance of nutrition and wellness" onük dak ajemdaker sepaitem atema lecture ka ayongzüka katsüogo.

Iba sentong ayongzüka katsüba atema ajaki kanga pelaba lemsatepba den nüburttem aser security forces tsüngda tesendaktep tajungba kümdaktsüogo.

Naga Hospital Colony nung merükmeju sentong ayongzüka agi



May 11 nü Naga Hospital Colony, Kohima nung longjemmer merekmeju sentong ayongzüka agiba mapang tangokba noksa nung angur.

Kohima, Monupii/May 11 (TYO): Naga Hospital Colony, Kohima nung alirtem longjemmer Honibarnü merükmeju sentong tulu ka ayongzüka agiogo. Naga Hospital Colony Panchayat, Kohima tawabangba kübok iba merekmeju sentong ya anepdang 6 ako nungi tenzük aser 9 ako tashi agia liasü.

Kiyong nung alirtem nok, mertsüng, shovel aser gunny bag tem bener colony ajanga aoba National Highway 2 densema lenmangtem, thoroughfares, kilentsü aser mozüki temeket mereka liasü. Naga Hospital Authority Kohima (NHAK) aser District TB Center (DTC) naprongla

Naga Hospital Colony, Kohima kübok lir.

Kasa mapang nung Naga Hospital Colony Panchayat mendenbuba Teisobou Sekhose-i, colony, tetsür aser lanur lokti tentet tenüng nung colony nung alirtem, shishilembartem, taxi driver aser kiburtem dang iba merekmeju sentong nung shilem agiba atema kanga pelaba lemsatepa liasü.

Nüburttem aika adenshiba ajanga lokti telongjem aser kiyong terenlok asoshi bendanga agüja aliba sayur, ta paisa ashi.

Maneni pai, lokti ajungkettsü atema teti longjemmer inyakttsü ayongzüka liasü.

Mokokchung district nung pension benefit agütsütsü

Dimapur, Monupii/May 11 (TYO): District Welfare Officer, Mokokchung-i sangdong ka ajanga Old Age Pension, Widow Pension, Disability Pension agia aliba beneficiary tem dang 2022-2023 atema Direct Benefit Transfer (DBT) ajanga pension benefit mongui alirtem nem May 15 nü nungi tenzük District Welfare Office, Mokokchung nung agütsütsü ta metetdaktsüogo.

Beneficiary tem shirnoki bank account details magütsü ali, parnok dang parnok indang bank account passbook photocopy ka sayutsü tetuyuba agütsüba den bank account maliba beneficiary tem nem benefit magütsütsü, ta metetdaktsüogo.

Beneficiary tem shirnok tsüngtong maruteter parnok

melena arurtemi par Arogo Pastor ket nungi beneficiary tem indang Life Certificate den beneficiary ajak indang pension Payment Book bener arutsü tetuyuba agütsüogo.

Tzükong/yimtsüng/kiyong telemsa dak ajemdaker mapanglem:

I. Mokokchung Jila

1. Arkong, Aongza, Alongmen, Alempang, Artang, Penli, Majakong, Mongsenbai, Kumlong, Lijabalijen: May 15

2. Sangtemla, Salangtem, Sungkomen, Yimyu, Marepkong, Kichutip, Dilong, Tongdentsuyong: May 16

II. Ongpangkong

1. Ungma, Kubza, Settsu, Aolichen, Alichen, Mokokchung Vill & Compound, Longmisa,

Chuchuyimpang: May 17

2. Longsa, Meilong, Moalenden, Chubayimkum, Longkhum, Mangmetong, Khensa, Mekuli: May 18

3. Chungtia, Aliba, Kinunger, Sabangya, Longjongkong: May 20

III. Asetkong

Mopungchuket, Longpa, Chami, Kubolung, Khanimo, Sungratsu, Yimchalu, Alongchen, Longjang: May 21

IV. Langpangkong

1. Yisemyong, Mongsenyimti Vill & Comp., Pangsang Longkong, Chakba, Yaongyimti Old & New, Salulamang: May 22

2. Kangtsung, Wameken, Aopenzu, Anaki, Tuli, Luyong, Tzudikong, Chuchuyimlang Vill. &

Comp, Unger, Akhoya, Asangma: May 23

3. Changtongya/Yimsen & Town.Yaongyimsen Vill & Comp, Merangkong Vill & Town, Kelingmen" May 24

V. Jangpetkong

1. Khar, Molungkimong, Yimchenkimong, Alongkima: May 27

2. Changki, Nokon, Longnak, Merakiong, Molungyimsen: May 28

3. Waromung, Chungliyimsen, Mongchen, Debuia: May 29

VI. Tsurangkong

1. Chngtiyimsen, Longphayimsen, Watiyim, Medemyim, Aokum, Aosenden: May 30

2. Aosungkum, Satsuk, Shaiphumi, Akukaiga, Moayimti, Vikuto: May 31

VII. Japukong

1. Mangkolemba, Japu, Longjemdang, Alongtaki, Lakhuni: June 1

2. Changdang, Athuphumi, Nokpu, Aonokpu, YaMayg A, B, C: June 3

3. Lirmen, Akumen, Tsurmen, Saring, Longchem: June 4.

Maneni Active Bank Account aliba beneficiary tem nem parnok indang Pension benefits tem teküboklen agüja aliba anogotem nung sen parnok indang account-i yokogo.

1. IDBI Bank - 29-04-2024

2. Indian Bank - 29-04-2024

3. CBI Mokokchung- 30-04-2024

4. Canara Bank -02-05-2024

5. NStCB Ltd -03-05-2024

6. Bank of Baroda, Ungma- 04-05-2024

7. CBI Kubolong-06-05-2024

8. SBI -07-05-2024.



May 11, 2024 nü Andhra Pradesh kübok Kadapa nung Congress lenir Rahul Gandhi aser party lenir Y.S. Sharmila na Lok Sabha election nüboyim sentong ka nung tangokba noksa nung angur.

India-i Palestine UN züngsem akümtsü pusema vote agütsü

New Delhi, Monupii/May 11 (Agencies): Hokolbarnü United Nations General Assembly (UNGA) nung Palestine United Nations nung züngsem akümtsü atema renemba bangzüng ka pusema India-i vote agütsüogo.

Iba bangzüng ajanga UN Security Council dang ibaji agizüktsü mepishir.

United Arab Emirates-i benokba 'Admission of new Members to the United Nations' bangzüng atema jembitsü asoshi anepdang rongdak senden ka ayongzüka liasü aser iba senden nungji United Nations Assembly

nung linük 193 prongla aden. Iba bangzüng ajanga Palestine ya UN nung züngsem akümtsü atema benoker.

Iba banzüng pusema India densema linük 143-i vote agütsü, linük 9-i iba bangzüng anema vote agütsü aser linük 25-ibo vote agütsüba nungji shilem magitsü lemtet.

Iba bangzüng ajanga UN Charter kübok Arrla 4 nung aliba ama UN züngsem akümtsü atema Palestine temsüa lir, anungji Palestine ya UN nung züngsem akümtsü atema temelaba agütsü, ta metetdaksü.

1988 küm aser 1996 naprongla nung Palestine ya linük ka ta agizükba mezüngpur linüktem rongnung India densema liasü aser India-i Gaza nung Representative Office to Palestine Authority amenok aser 2003 küm Ramallah-i belen.

Tan ita tetenzüklen India Permanent Representative to UN Ambassador, Ruchira Kamboj-i, UN nung züngsem akümtsü atema Palestine-i mepishiba Security Council-i magizük aser ibaji UNSC nung veto ajanga liasü, ta metetdaksü.

LS election shilem 3buba nung voters shilem 65.68-i vote agütsü: EC

New Delhi, Monupii/May 11 (Agencies): Honibarnü Election Commission of India (ECI)-i, May 7 nü agiba Lok Sabha election shilem tasembuba nung voters shilem 65.68-i vote agütsü, ta metetdaksü.

Congress Tir, Mallikarjun Kharge-i shidi ka ajanga opposition INDIA teloktep nung lenirtem dang, election commission-i sangdongba vote agütsüba data meshidak, ta metetdakja liasü.

Lok Sabha election shilem tasembuba ajanga states aser union territories 10 nung constituencies 93 ayimjema liasü.

Election shilem tasembuba nung vote agütsütsü temsüa alir tebur voters 1,07,64,741, tetsür voters 1,02,26,946 aser third

gender voters 929 liasü. Election Commission-i sangdong ka ajanga, election shilem tasembuba nung tebur voters shilem 66.89, tetsür voters shilem 64.41 aser third gender shilem 25.2-i vote agütsü, ta metetdaksü.

May 7 nü Assam nunga parliamentary constituencies pezü nung election agi aser state nung voters shilem 85.45-i vote agütsüba data meshidak, ta metetdakja liasü.

Voters shilem ishitibai vote agütsüba Uttar Pradesh kübok Lok Sabha constituencies 10 nung liasü. UPe nung voters shilem 57.55-i dang vote agütsüba data meshidak, ta metetdakja liasü.

Assam kübok Dhubri constituency nungbo voters shilem 92.08-i vote agütsüba data meshidak, ta metetdakja liasü.

May 7 nü Jammu & Kashmir kübok Anantnag-Rajouri constituency nunga election agitsü liasü saka Election Commission-i election shilem 6buba- May 25 tashi atsülangtsüogo.

Gari lenmang majungba aser tsüngsang-mopung majungba den külemi tetsükdaksü balala ajanga election nüboyim magiteti liasü, ta shia May 25 tashi election atsülangtsüogo.

May 13 nü Lok Sabha election shilem pezübuba agitsü.

Lok Sabha election shilem tasembuba tashi nung menden 283 atema election agiogo aser tanüngba menden 260 atema May 13, May 20, May 25 aser June 1 anogotem nung election agiba sülen June 4 nü vote azüngtsü.

China ambassador Xu Feihong India tonga aruogo

New Delhi, May 11 (Agencies): 2020 küm May ita nung Ladakh arrtsülen India aser China sepaitem tsüngda raraba sülen tang tatemsa China-i par ketdangser, Xu Feihong India-i yokogo.

Hokolbarnü Feihong aser pa kinüngtsü, Tan Yuxiu na New Delhi tonga aru.

Feihong Xu-i, "Linük anaprong tebilemsü onüktem lemsateptsü aser ken o jembiba ajanga tekeraba nung ajaki melungtepa telemteba agitsü asoshi China-i India den inyaksü melunga lir," ta metetdaksü.

China Tir, Xi Jinping-i arrshi küm 60, Xu 17buba Chinese Ambassador to India shima liasü.

Xu-isa, "China-India tesendaktep dak sendakba nung Ato kilonser Modi-i jembiba o ni züngoka yuogo, iba sülen Chinese Foreign Ministry otongdaria telangzüba agütsüogo," ta ashi.

"China-India tesendaktepji ken o ka mesüra area ka nung

dang ajemdaker meratetsüla, ta China-i bilemer; tesendaktepji arrtsü lenla ajanga dang masadangtsüla. 2014 küm September ita nung Indian Council of World Affairs nung jembidang Tir Xi Jinping-i, asenoki tangatetba balala nung dang merangloksüla aser asen tesendaktep aser amalitep mamadoktsüla, ta jembia liasü," ta China ketdangser Xu-isa metetdaksü.

"India sorkar aser sector balala nungi medemertemi nungitba aser yariba ajanga ni ambassador mapa inyaktetsü ni yongyar aser tamang akar," ta pai metetdaksü.

"Asenoki climate change, chiyungtsü aser energy aser rongsenkettzüng densema alima nung tayongzüka jenti ajangshidar. International aser regional onük balala nung tongtepratepa amalitepa inyakba ajanga linük ana aser alima nem maongka agütsüba dang masü saka international tesendaktepa tashi itshitsü," ta paisa shisem.



May 11, 2024 nü Khachrod nung taoba mapang Madhya Pradesh chief minister aser BJP lenir, Shivraj Singh Chouhan-i Lok Sabha election atema nüboyimdang tangokba noksa nung angur.

BJP-i aniba NDA-i menden 230 dak tali mangutsü: Arvind Kejriwal

New Delhi, May 11 (Agencies): Honibarnü AAP tongti lenir aser Delhi chief minister, Arvind Kejriwal-i, tang agiba Lok Sabha election nung BJP-i aniba National Democratic Alliance (NDA) teloktepi majority mangutsü aser ibaji ajanga sorkar akümtsü atema Opposition INDIA teloktep nem lenmang lapoktsütsü, ta metetdaksü.

Delhi excise policy ken o nung pa bail anguba sülen anogo ka lir AAP headquarters nung osangbenertem den jembidang pai, Ato kilonser Narendra Modi-i 'linük ka lenir ka' atema inyaker, aser tang agi tasembenbuba takok ngura opposition lenirtem jail nung puoktsü, ta ashi.

"Jail nungi chiokba sülen tesüiba ghonda 20 tsüngda ni election mongintem aser nüburtem den jembiba ajanga BJP-i sorkar makümtsü ta ni jangaogo," ta pai ashi.

"June 4 sülen par (NDA) sorkar metentetsü. Haryana, Rajasthan, Bihar, Uttar Pradesh, Delhi, Karnataka, West Bengal aser Jharkhand state tem nung parnok (NDA) menden tajemba

dang kümdar. Parnoki menden 220-230 dang angutsü. Centre nung INDIA teloktepi sorkar tentetdar," ta Kejriwal-isa metetdaksü.

Kejriwal-i, Ato kilonser Modi-i Aam Admi Party samatsütsü atema ajak inyaker, kechiyong pai AAP lenir pezü jail-i yokogo, ta ashi.

"Tesüiba küm 75 tsüngda iba tashi yabo party ka danga amokmeren mesüdang. Ato kilonseri pai ochimashi anema rarar ta jembir saka auertem ajak par party nung lir. Anogo 10 tejaklen ochimashir ka par party nung dendaktsüba sülen Deputy CM aser Minister kümdaksü. Ni Ato kilonser Modi dang ya shiner- nai ochimashi anema raranüra Kejriwal dang nungi angazükang," ta Kejriwal-i ashi.

"Delhi nung sorkar akümba sülen ni ozü minister ka anentsü aser jail-i yok. Punjab nunga onoki ozü minister ka jail-i yokogo. Naibo (Modi) auertem ajak ner party nung anioke aser Kejriwal-a jail-i yok, iba ya ochimashi anema raraba masü," ta Kejriwal-isa ashi.



May 11, 2024 nü Kannauj district nung Lok Sabha election nüboyim sentong ka nung Samajwadi Party Tir, Akhilesh Yadav-i lokti dak teka ayiploksüba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, MAY (MONUPII) 12, 2024

Odang Meimba Ojala

Obalaa junger saka ojalasa tajungba, kechiyong la kinungboi la meimba dang nungibo lai pa meimba temeimsa tuluba. Obalaa kanga meimer saka pai par chirnurtem meimba dang nungi ojalai lar chirnurtem meimba temeimsa tuluba, kechiyong laibo la kinungbo aser chirnurtem ajak odang meimer. Odang meimba temeim jenjang ya asenoki Laishiba nung Yohan 3:16 nung shia angur. Tsüngremi asenok odang meim nung Pai Par ajaso chir asenok kümzüksü asoshi kotak lima tajung toktsür alimai yokbaji asenok temeimtsüka asüba agi masü saka temeimtsü maket ser nung Tsüngremi odang meimba agi asenok kümzüksü asoshi yokba liasü. Iba angati temeim jagi tanübo asenok kümzüka lir aser asenokbo süaka taküm alitsü. Iba Tsüngrem temeimji angatetra, asenoki alima nung ojala temeima melamelaa angatetsü. Asenoki ojala dang temeim ojala ta ajaba ya asenoki ojala meimba agi masü saka lai asenok temeimba meimba agi temeim ojala ta ajar ta asenoki kodang angatetdir, ano idangjiang asenoki ojala temeimji tejangjaba nung angatetsü. Iba ojala ya Apijemtsü Shin 31 tekong 14 aser 15 nung shia aliba rong koba agi alima talang nungi tzüim tulu ajanga nübortem asoshi chiyongtsü amena bener arur, tetsür shibai kinunger shinga mesakdang, ano mesangwai lia, labo saker kinunger ajak asoshi soruchioka renemtsür, atangji, laji temeim ojala lir. Ojala taküm nung kodanga amui oshia mao aser obala tashi angudakji ojala liasü. Ojala mali asübo obalai taküm tzüim nung yipru tulu ajanga kinunger ajak nungdak peria rong nungji bener marutetla. Ojala mali asübo obala kisüngibo chirnurtem aika tajung mekümdaktsütetla. Aji oda, Tsüngrem temeim agi asenok menen aika liaka, item ajakji nembanga yutsü ama, obala aser chirnurtem dak tashimait aika liaka, ojala ajungba agi, ojala shisa akaba agi, ojalai aremzükbba agi aser ojala sarasadem agi obalaa tangar rongnung züngshitsüsa aser par chirnurtema tangar asoshi temoatsü taküm asütsüsa kümteba chirnurtem aika lir. Temeim yabo temeimtsü maketba tesem aser temeimtsü maketba purtem asoshi nungdaker. Temeimtsüka, tashi tanga aser topur tajung meimba temeimjibo nisung ajaki agütsütetsü saka temeimtsü maket, tashi manga, samaro, teselep aser mangatetba tanur dena meimtsüba temeimjibo ojala dakang lir. Iba temeim jagi asenok dang maremzüc asübo asenok aika alima nung nisunga masü, shirurua masü ta meshimetsüa senzüa lila. Ojala temeim agi asenok mazüok asübo asenok aika mashi ka nung taküm samar lila. Ojalai aiben chiyongtsü tajungbo mechinü, kechiyong lai asenok nemang chidaktsünü. Ojalai küm junga süoshi tasen mali, kechiyong lai lar chirnurtem akabaji la akaba dang nungi taoba ta bilem. La tangar ama ki tajung nung malir, süoshi tajung magir, chiyongtsü tajung machir saka lai lar chirnurtem tajung akümba angudang lai la timtem aser makamait ajak amadoker. La asoshi chuba kiji lar chirnurtem aser takar chiyongtsüjia lar chirnurtem tajung akümbaji ta lai bilemer aser yangji mulung anisüngzüker. Asenok mejungaka ojalai asenok dak kodanga teimla mesama, lai asenok den teti teimla o jembai aser asenoki la akümstübuttsü melen laiang asenok akhümstübuttsü bensi. Iba temeimji Tsüngrem temeim denang tera mesüktepa asadangtetsü. Asenokibo ojala mulung amsadaktsü saka lai ola madoki odang meim. Odang meimba temeimla to tanübo asenok aika den taküm mali kanga menungra a bilemer. Asen dang odang meimba Ojala jak bilemtet dang la temeim tali jangjar aser meyipa agütsünüa aiter. Ajisüaka, asenok dak malangba odang meimba temeimji ojala nem meyipa agütsüdi asüyonga komaka agütsütetsü ? Aji makoktsü. Hau ojala taküm alidang lai odang meimba yari mesüaka chirnurtem aikati meima anepalur. Atangji, iba temeimjibo odang meimba temeim masü saka tuluka agütsüba nungi tilaka meyipa agütsürba dang asütsü. Ajisüaka, ojala dang temeim sayutsüsa akümli nung maongka angurtemji tia akartem, parnokjibo ojala meliaka ali ama anogo shia ojala temeim aser temoatsü nung alitsü. Ibaji bilemdanga, tanü alima ajaklen Tetsütem Temeim anogomung amungdang, ojalai asen dang odang meimba temeim asoshi 'Oja', kangasa pelar ' ta shidi aser Tsüngrem tenüng sangdi.

OLEMSABANG

Nüji makümba nisung kaji tamaji nisung mesuk

~ L.Kika Pongener.

Nisung shirnoki ochi aser tiyazü bendanga meteter, tajung o tamajung bendanga meteter, shitak aser meshitak bendanga meteter, shitak angateter, shitak angashir, shitak angur, shitak ajiteter, ibala nisung dangji nüji nisung ta ajar. Aji oda, nisung karbo nüji sernung nüji nisung ama melitetba lir...Ochia ta metet, shitaka ta angatet, tiyazü ta metet aser meshitaka ta angatet...Saka indang-indanga ochia, shitaka, taira, aser meshitaka ta meshiteter...Aküm-sentsü-keter, taka-taiter, tular kar tejak maremba agi indang-indanga meshiteter. Iba amala nisung dangji nüji makümba nisung ta ajatsü. Atangji, sowar, mato-malem aser tamaji nisung masü sernung, nüji ama mejembiba/melitetba jagi tamaji nisunga ta ajatsüsa kuma-adok. Ajisuaka, tamaji nisung-ibo ochi o tiyazü na mebendangteter, shitak o meshitak na mebendangteter, tajung o tamajung na mebendangteter, oda tangari kechi jembiang ta ajur agütsür aji dang jembir...Tangari tamajung asüyongjia tajunga ta shira tajunga ta ashir. Iba amala nisungji kanga-sa tia maka akümli piyong tangar tenzüka tangar küpok alitsü.

Shirnok pei sasa pei tetsüng agi menokdaktet, tangar dak metaloker/nendaker alir, shirnok pei sasa pei kibong tepok sunga melitet, tangar dang meshi-metsüa alir...Parnokji nüji nisung amai linuyongjia melitet, kechiyong makamaitba agi, machi-majem maremba agi takar-tular, sentsü-aketer dang apudaktsüsa akümer. Aji oda, apoamashia chia-jema aka nungji, takar-sang, tular-sang sentsü aket-sang jagi kechi shidir, aji tashi angatsüsa akümer. Kechiyong parnok dangji aputaka kulem nungdang kibong aser takümji mesua litetsü. Otsüla-oboula nungperpo alu meranga yimer, temerang chi chiyunga aliba agi, shinga danga meshi-metsü mesui, pei sasa pei kibong tepok sunga ali. Yongji shinga daka menendaki/memetaloki pei kibong taküm mesua ali. Yongji, shinga daka metsükdak, shinga nukena metsübo, shinga tejak marem mali...Tasü-ita, indang-indanga ochi dang ochi aser shitak dang shitak ta shitet. Tesasatsüka, tanu yimden yimsusur-a suang, arogo lennir-a suang, lokti nung ata-a atongoker-a suang, nutsüng ka danga suang, mapa meranga meinyakba, alu meranga mayimba aser azümesenba agi nüji nisung masü ama tangar küpok alitsüsa akümer.

Tesasatsüka, tanu putu nung yimdam yimtsüng nung alir-a suang, Jila nung alir-a suang, kanga-sa makamaitba agi takar-tular aser sentsü-keter kar dak nendaker/metaloker par lar/kilir kümer alitsüsa akümer. Nüji sernung nüji masü amai tular-takar aser sentsü-keter-ji Tsüngrem kümdaktsür apudaka külemtsüsa akümer. Yongji, ochia ta metetaka, shitaka ta angatetaka, tajunga ta metetaka tim o meshiteter. Maka-mait marem, machi-majem marem, metetsümonga tiyazü jembitsüsa akümer, aibelentsüsa akümer aser auyatsüsa akümer. Ano tamanger tajung aika, Revival sentep nungpo teka madena ken jangra-pangra-a atentsü, nuksu yima jepa sarasademtsü, jokdena-pongdena ken atentsü, saka kodang tenla kidang nungi kimai ayazüka ludir...Tim masüba lenmang kar nungi mela-mela sen/tajangzük kar angutsüsa denjira aji mepaitoktet mettsüdaker alanger, kechiyong maka-maitba agi mela-mela tatidang nungji tsüker. Aji oda, kibong nung kanga-sa maka-maitra, ochishia linuyongjia melitet, shitak jembinuoyongjia mejembiteter aser nüji nisung ama linuyongjia melitet. Aji oda, yimden, arogo aser loktiliba balala nung tazüngpur agi ataa/atongoka liaka, maka-maitra, tangar dang teka ladaker, lalashiponga meshi-metsüa alitsüsa akümer...Yongji ochi o songtet-songteta mejembiteter, tasü-ita ochi o mebendangteter aser tasü-ita ken o teret malangdangteter.

Tesasatsüka, tanu yimden yimsusur/lennir-i anir nutsüng-nubur aika yabo meshitaka, iba nung yapo manidaktsülaa/madentsülaa ta metetaka/jembiaka sen nukshidang, menden tajung aginudang, nüji masü amai tangar sulen sena-sena anidaker. Tangar kin oda yutsür, asen Aotsür Aor senso tajung aika Esau-i pei tambu senmang (Birth-right) aya marem chi-auso ka yong ayokba ama, pei temeden yoka achir. Anungji asenok tashitemeteter kin ka amai tanak dang tanak ta, temesung dang temesunga ta indang-indanga shiteta lidi. Kechiba asenok nüji sernung tamaji amai alitsü...??? Kechiba asenok tamaji amai tangar nem...arung...oang...nokdakang...menang...ta tenarong nung ammer attsüshia anishidaktsütsü...??? Aor shin o ka... "Sangkhen (Lizard) moko-scu agi alak"... "Pokpo (Owl) azüngkenshi agi alak"...ta jembir. Tetezü...Tangar sentsü metizük aser tangar tejak marem...Tangar nukrang metizük...Mozü kar agi alet amai nüji masü tamaji ama kümer...Tangar sulen hau-hau ta tekong angumdena anidaktsüsa akümer. Arung asenok otsüla-oboula nung ama alu meranga yimer, pei sasa meranga inyaker, pei kibong aser taküm tepok sunga, temerang chi chiyunga, shinga daka memetaloki alitsü meranglabaa.

Ano kanga-sa tesasatsüka, tanu Aor senso lennir tajung karbo kaa-ita peria lir sernung, shisatsü agi anung-akongba agi...Pei küpok tenya-ashi anga-a aser tenzüka alirtemi kibur kümja sanga jembiba nung akoseta pelaseter...Jang (Buffalo) teni nung sung-zü ruoker 'Golir' chanu kati attsüshia anishiba amai anishidaktsür...'Shidi' (Elephant) tekolak nung merang ajok ka agi tsüngshia 'Miya' nung chanu kati anishiba amai anishidaktsür. Ano Aor senso tajung aika sen agi tenuk poka-doker tangar sulen tim masü-a ta metetyongjia ola madoki sena-sena anidaker. Atangji, nubur ajunga tamaji amai kümer, tamajung nung konang agitepa, kati ka den arishitepa aser tsükchitepa alir...Idangji lenla ajak nung tangar memenup tesuleni aor-a ta memeteter...Arung asenok meranga inyaker, takar-sa masüyongjia, asen sasep tepok sunga alitsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur nung Alcoholics Anonymous Ajungmeso sentong agi



Impur, Monupii/May 11 (TYO): ABAM Social Concern ajanga ayongzuka Alcoholics Anonymous Ajungmeso Sentong tanabuba ABAM Zone 1-7 asoshi Impur nung May 10, 2024 kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Tayongzükba o jembidang Rev. Dr. Mar Pongener-i T. Ken 3:5 nung ajemdaker, asenoki Pa den kütepakasa Tsungremer taochi agi asen tangola methitemi agia tanü tashi taküm lia yangi arua lir, ta ashi.

Paisa, Tsüngremi agütsüba tangola amajok mesüdakdaksütsü ta angateta ni tangula agia aliba mapang ni ama temesepba chiyungtsü lar

kabosa Tsüngrem dangi anir arutsü ta meranga inyakang, ta ayongzük.

Mrs. Arenla Lkr, Secretary, ABAM WM ajanga Tsüngrem O nungi lemsaba mapang nung Philipi 3:12-14 nungi zünga Tsüngremi Paul kechi nükjidong nung aja pai yamaji lia tenyartem rongnung tongtipur ka akümba ama Tsüngremi na kechi tia nung lia Pa nükjidong ka yur aja aji angateta tabensaba aser nükjidong atongba taküm masütsü akok saka nisung shiai ni kar asoshi tekümzüker kaka asütsü, ta angateta lira asen lima nung temelenshi tulu adoktsü ta shia ajak kanga temoatsü nguogo.

Mr. Kilang Imsong, Director, Life Anew

Foundation, Unger ajanga Arogotem nung AA anebalurtem den meteta alitsü nungdakattem tim tesayuba tajung agüja tezü medangi anebaluba nung takok tulu lir, ta sayua liasü.

Mr. Limasangwa, Coordinator, Media & Social Concern ajanga tesüiba mapang nung ajangshiba bilemteta tarutsü asoshi nukla ayuba nung takok lir, ta tesayuba tajung agüja liasü.

Ajak agi Arogo 26 nungi AA züngsem aser parnok anebalurtem 348 arua iba sentong nung aden.

Maneni Arogotemi rongsen jenti indoka taküm kümzüka wadang inyakang Tsüngremi takok tulu agüjang, ta sarasademer.

ANOGO ABEN TSÜNGREM DEN

TSÜNGREMI ASEN SARASADEM LANGZÜR

Aser Tsüngremi shimtetbatem shirnoki anüngdang aser aonung maneni pa dang ayimtener; Tsüngremi parnok atema o mebendangtsü ama? Luk 18:7

Anüng ali yanglusang Tsüngremi asen sarasadem angashit aser Pai asenok anepalur, aria bilemetsür. Anungji Pa nem tenüngsang agüja sarasadema lidi. Sarasadem agi asenok S yanglushidaktsür. Tsüngremer tenangzükbaji asenoki dang meshiteta sarasadema lira Pai langzütsü. Temeshipuri nentaka sarasademba nung telangzüba angur. Sarasadem nung mapang endokba ajanga tanela nung temoatsü, ain tashi, takok, tepela, aser tajangzük tulu lir.

Osangtajung Luk 18:1-8 nungji Yisu o-entepba ka angur. Yimti ka nung obendanger ka liasü, pai Tsüngrem metsübu nisung mezüngmeshia liasü. Amitsür ka aiben pa dangi arua ochi obendang la anemer anema agüjang ta mepishi. Saka pai aji memulung. Aji oda süaka obendanger jagi la aiben aruba jagi lakteter obendang agütsü. Iba ochimashi obendanger dang mepishiba amaji Pa dang mepishidaktsürner ta masü. Saka maneni o-entepbaji zünggra, yamaji ochimashi obendangeria inyakra, Tebu Tsüngremi Pa nübur shirnoki anüngdang anepdang ayimtener Pai parnok sarasadem melangzütsü no? Iba o entepba ajanga Yisui asenok dang maneni tamang agi sarasademtsü sayur. Temeim amangbapurtem, aseni mepishiba amajok masür. Anungji mangapurte agi asen Tsüngrem dang sarasademdi Pai asen sarasadem angashia langzütsü.

Goa nung High Court-i Protestant pastor ka pusema obendang agütsü



Pastor Dominic D'Souza aser pa kinüngtsü Joan Mascarenhas D'Souza na

May 11, 2024: Anüolen India nung aliba state ka nung temaba court kati Protestant pastor aser pa kinüngtsü na pusemba obendang agütsüogo.

Pastor aser pa kinüngtsü nati ozüng alema tangartem Khristan yimsü dangi meyipdaksü, ta tai tonglokja ketdangsertemi tena yimdak nungi meindoka liasü, ajisüaka court-i ketdangsertem tetuyuba anema obendang agütsüogo.

May 8 nü Bombay High Court Goa bench-i district collector tetuyuba agientsüogo.

District collector-i Pastor Dominic D'Souza aser pa kinüngtsü Joan

Mascarenhas D'Souza na Goa kübok Siolim yimdak nungi aotsü tuyua liasü.

Pastor aser kinüngtsü nati Five Pillars Church tenteta lir.

Taküm March 14 nü North Goa district collector-i Goa Maintenance of Public Order & Safety Act kübok pastor aser kinüngtsü na dang ita 6 atema North Goa toktsür oang, ta tuyua liasü.

Pastor aser kinüngtsü nati 'black magic' amshia Tamil Nadu state nungi arua Goa nung alir Hindu nung B Vadivel Khristan yimsü dangi meyipdaksü, ta tena nem tai tonglokja liasü.

Taküm January ita nung Vadivel-i pastor aser

kinüngtsü na anema ken o ka benokba sülen district-i pastor anema tetuyuba agütsüba sülen pastor-i district collector tetuyuba anema state chief secretary office nung temepishiba ken o ka agüja liasü.

Ajisüaka Chief Secretary office-i menoa telangzüba magütsüba agi pastor aser kinüngtsü nati Bombay High Court nung temepishiba ken o agütsü.

High Court-i district collector tetuyuba anema obendang agütsüba sülen high court nung pastor atema ken o jembitsür advocate Kapil Kerkar-i, "Joko tena kidangi meyipa otettsü," ta ashi.

Mapang ka nungbo Goa nung loktiliba aser yimtenren tsütsü Catholic Khristantem tashi tulu liasü. Goa ya Asia nung Catholic mission atema tiyongtsü tesem ka liasü aser 1533 küm Goa diocese tenteta liasü. Iba mapang nungjagi Goa diocese ajanga Sotuh Africa nung Cape of Good Hope nungi China aser Japan tashi ayimjema liasü.

Tang Goa nung nütsüng million 1.5 shi lir aser nütsüng shilem 25 shi dang Khristantem lir.

Tang Goa nung BJP sorkar lir.

Florida nung aliba tzüyimküm ka nung nisung 1,126 baptiogo

May 11, 2024: May 5, 2024 nü Florida kübok Jacksonville nung Eleven22 Arogo nung nisung 1,614-i Yisu Khrista agizüka tzü nung baptiogo.

Jacksonville nung aliba Hanna Park Beach nung baptiba sentongji agi aser iba sentong nungji Arogo nung züngsemtem, kibong züngsemtem aser medemertem aden.

Yaküm-a baptiba sentong nung nisung 1,126 baptia liasü, aser ibaji America nung puti otsü nung tzüyimküm nung nisung teimtiba baptiba sentong tulutem rongnung ka liasü.

Northeast Florida aser southeast Georgia densema linük tesem balala nungi nisung aika adenshia iba sentong nung aden.

Church of Eleven22 tentetsang aser pastor, Joby Martin-i, "Nisung ajak Yisu Khrista den tesendaktep tajungba kümdaktsütsü atema onoki inyaker. Tanü nisung 1,600 dak temai Yisu Khristaji pei taküm nung Kibur aser Kümtetdakba, ta agizükogo. Iba dang nungjagi tajungba kecha mali. Arogo taküm lir, Tsüngrem tanela arakzüdar aser Yisu Khrista osangtajung ajanga takümtem melenshidar," ta metetdaksü.

"Tzüküm nung baptiba sentong reprangtsü atema onoki onok meyong website, coe22.com mesüra official Instagram page instagram.com/coe22 nung reprangtsü jaoker. Item websites aser Instagram nung nenoki tanü tzüyimküm nung baptiba noksa balala den video reprangtetsü," ta Arogoi metetdaksü.

"Church of Eleven22-i Yisu nem bendanga agütsüba, nütsüngsüba aser nüburtem taküm melenshidaktsüba ajanga T s ü n g r e m sentsüwangshidaktsür. Tanü agiba sentong ajanga longjemba agi Arogo nung tepela aliba nenshia metetdaksür aser iba tepelaji Tsüngrem nungi dang angur," ta Arogoi metetdaksü.

Joby Martin ya Jacksonville, Florida nung Church of Eleven22 tentetsang aser tongti pastor lir. 2012 küm pai iba Arogo tentetba sülen pa leniba nung nüburtem nem Tsüngrem metetdaksütsü aser Yisu Khrista den tesendaktep tajungba kümdaktsütsü atema inyaker.

Church of Eleven22 leniba dak alia Pastor Joby Martin ya kakat zülur ka, international sayutsüngir ka aser tesayur ka lir.

AO OSHI ANGAZÜKDAK:
TANÜ ANGAZÜKTSÜBA OJANG



Süngpur

(n) zünga telemsa nung tanubuti (youngest age group)

* Ariju nung mapa tasakbo ajak sünmgpur züngai inyaker.

Süngra

(n) manepetba tashidak tuluka (cancer)

* Tanü asüng süngra tashidak agi aika shiranger.

OLONG PAITEP # 6784

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN		LANGTSÜNGLEN	
2. Auonungchiyongtsüasenba	-(7)	1. Lenmang	-(7)
5. Mangyimba mapang	-(5)	2. Aor kidong ka tenüng	-(6)
7. O tamendakdak	-(4)	3. Tenarong maten	-(6)
8. Peidak malangba	-(7)	4. A ___ g	-(3)
10. Juli	-(7)	6. Mopung apodoka	-(3)
12. Sen ayudak	-(7)	ola adokdaksüba	-(3)
14. Tenük agi ajitet	-(4)	9. Tongtipang tagitsü	-(7)
15. Tamajung aküm	-(5)	10. Menungra bilem	-(6)
16. Apuso	-(7)	11. Aiür	-(6)
		13. S ___ k	-(3)
		14. T ___ r	-(3)

TIPIEN :		LANGTSÜNGLEN :	
1. Karanur, 5. Entsü, 6. Lan,		2. Amang, 3. Repranger,	
9. Agi, 11. Akong, 12. Ain,		4. Osü, 7. Tajangzük, 8. Rogo,	
13. Tasen, 14. Oru, 17. Ati,		10. Itsü, 15. Ratet, 16. Sen.	
18. Kensü, 19. Khrista.			

- Sangro -

Tanü ojala nem aküm tutushi agatsüba anogo

O oja alima nung konang nungsang Jenti liakasa ojala meim amabo kecha nunga monguka, oda tsüngküm meongpu melenshia aruaka oja na onok jenokdak akümbok ki tajung ka mesük. Akumli nung kibong khuret jenti liakasa nü shisatsü terajem den nü tamang sarasadem agi item ajakji aremzüka nai onok tajung kümdaktsüogo nii.

O oja na menürem jak dener kibong nung timtim jenti aremzüka mapang ajak nung onok dang sayupentsü tajung agüja lia aruogo nii.

Anungji oja tanü nü temeimji onoki bilemdangra anü ita pitinu sentsü perangshia liakasa iba dang nungi nü temeim tuluba. Anungji tanü onoki nü temeim bilemteta aküm tetushi agüja amunger. Tatem nung onoki ojala akümli nung nü arishi talang moajang ta onok sarasadem.. Amen

~ Repa pongen

Manipur sorkari mepetmesü agi kongshir alirtem atema jenjang agi

Guwahati, Monupii/May 11 (Agencies): 2023 küm May 3 nü nungi tenzüka kin o kin tsüngda mangatetep adokba sülen Internally Displaced Persons (IDPs) tem nem teyari agütsütsü atema Justice Gita Mittal tekolak sür Manipur nung Supreme Court-i shimba Committee on Relief and Rehabilitation tawabangba kübok Manipur sorkari jenjang tapet agidar.

Teyari agütsütsü nüngdaka aliba reprangteta Justice Gita Mittal-i Hokolbarnü skill training programme ka aser 'Youth Coach Level 1' certificate Programme ka electronically tenzüksüogo.

Iba den bendenloksema Manipur government aser Hyderabad indang Apollo Hospitals Enterprise Limited na longjemer primary health centre ka state yimtiba Imphal kübok Palace Auditorium nung lapokogo.

Tourism and Hospitality Skill Council (THSC) ajanga Capacity Building for Service Provider (CBSP) scheme

kübok hospitality sector nung skill training programme ya, mepetmesü agi kongshir aliba lanurtem nem mapa inyaksü atema maongka agütsütsü nükjiding nung amenokogo.

Training ya, food & beverages, guest service, customer relations, aser front office management amala mapa balala atema asütsü, aser iba ajanga hospitality industry nung mapa inyaksü atema training nung shilem agirtem nem tenüngdakba skill agütsütsü. Training agütsür ama private company tem den longjemer inyakba ajanga state sorkari relief camp balala nung jenoka aliba lanur 2000 nem tajangzük agütsütsü aser iba ajanga parnok taküm liyonga aotsü asoshi lenmang lapoktsütsü.

Kasa mapang nung sorkari mepetmesü agi kongshir aliba loktitem atema healthcare services tanaben agütsütsü asoshi tongtibangsa inyakdar. Iba dak sendakba nung Apollo Hospitals Enterprise Limited den longjemer sorkari Imphal East district kübok Borobekra

yimtsüng nung Primary Health Centre (PHC) tanaben inyaksangshi tenzükdaktsütsü atema inyaktepdar.

Maneni saisapong koda tongtibang iba ya angateta Youth Coach Level 1' certificate programme ka tenzükogo aser iba ajanga grassroots level nung asayarterm coach kümdaktsütsü meranger.

football, table tennis, badminton, judo aser weightlifting asaya dak rangloker iba programme yagi state kübok tesem balala nungi pei ki toktsür jenshia or aliba lanur 300 nem specialised training agütsütsü.

State sorkarisa Hindu College, Delhi University, Ultra International Limited and the Lucknow nung amendaka aliba Council of Scientific and Industrial Research (CSIR)- Central Institute of Medicinal and Aromatic Plants (CIMAP) den longjemer wellness products atema fragrance formulations dak sendakba nung training programme ka yakta tenzüksü sentong lir.

Jala toktsür kinüngtsü o kinungbo na ULFA(I) nung aden

Guwahati, Monupii/May 11 (Agencies): Assam nung Tinsukia district kübok Kakopathar tesem nungi kinungtsü aser kinungbo nati arishi küm 4 tain jala ka kidang toktsür Paresch Baruah-i aniba ULFA (I) telok nung züngoksemogo.

Local media sangdong balala ajanga ashiba agi, Achyut Neog aser pa kinungtsü Mamata Neog nati par arishi küm 4 tain jala tetsü o tebou na nem Dirak Kapatoli yimtsüng nung toktsür

ao. Tanur ya Kakopathar Jatiya Vidyalaya nung azünger.

Osang ajangsa tena ya Myanmar nung ULFA (I) indang tamendakdaki or alitsü ta bilemer, ta ashi.

Iba osang ya Achyut tebu, Sanmon Neog atema taoksatsüka liasü, shiba taoba mapang ULFA züngsem ka liasü. Sanmon Neog ya iba telok nung arishi küm 18 asüba mapang 1993 küm aden aser lokti den sendaktepa alitsü atema ULFA tokja liasü.

Police ketdangsür tejen kati Sanmon Neog nem par jabaso aser kinungtsü-i iba telemtetba agiba indang osang agüja liasü.

"Parnok aoba sülen police ketdangsür kati kü dangi call süa ozü jabaso aser kinungtsü ka ULFA nung denogo ta ashi," ta Sanmon Neog-i local media dang ashi.

"Ni sir Paresch Baruah dang kokra tena meyipa yoktsü mepeshir. Tena jala ka lir aser jalai sürapur nüngdaker," ta pai ashi.

Cachar nung sen crore 7 alang heroin bener nisung 3 apu

Guwahati, Monupii/May 11 (Agencies): Assam nung Cachar kübok Silchar aser Dholai tesem nung police-i meita aoba sentong balala ayongzüka agiba mapang sen crore 7 alang heroin den nisung asem puogo.

Police sources-i ashiba agi, osang tejangja angazükba sülen Hokolbar aonung police-i

Silchar aser Dholai nung tesem balala meita oa liasü.

Meita aoba mapang police-i heroin asütsü ta temulung meleme bilemba temesepba mozü seret 1.2 apu.

Heroin gram 700 ya Dholai kübok Channighat tesem nung nguteta liasü. Temesepba mozü ya soap case 55 nung meima bener liasü.

Tanga meita aoba sentong ka nung Silchar anasa Sildubi tesem nung heroin soap case 45 nung sepa bener lia nisung ana puogo.

Tenati bena aliba heroin ya gram 500 shi asütsü, ta police-isa metetdaksü.

Aija alisang ana ya Kabir Ahmed Barbhuiyan aser Rajiv Uddin Laskar ta jangjaogo.



Imphal: Manipur Police Commandos aser Assam Rifles na longjemer Hokolbarnü Manipur kübok Thoubal district nungi pur or aliba nisung pezü kümzüko, ta defence otongdari Honibarnü metetdaksü

PELAR

"By the grace of God I am what I am." -1 Corinthians 15:10



LATE ODIMATSUNG PONGENER
1951-01.05.2024

Akümstübuwa aliba temiembatem, tsürapur **WABONG ODIMATSUNG PONGENER (CHUCHUYIMLANG)**, Shirangdang aser asüko mapang nung shirnokisa taküm, mapang, shisatsü aser rongsen agi onok den yaritepogo, kangasa pelarani. Nüburtem ajaki tajungtiba agi obala nem temiembatem, aküm aser tetushi agütsüogo aser tenungtem zülü tenzüknung mezulumatsü alinung, ajak melenalokti tenüng kar zülusemer.

1. Dr. Suhail Qureshi and Staff of Fortis Hospital, Shalimar Bagh, New Delhi
2. Dr. Aoakhum and Staff of Eden Hospital, Dimapur
3. Langpangkong Tzukong Mungdang
4. Langpangkong Kaketshir Mungdang
5. Chuchuyimlang Senso Mungdang
6. Chuchuyimlang Town Baptist Arogo
7. Dimapur Area Chuchuyimlang Senso Telongjem
8. Dimapur Area Chuchuyimlang Senso Tamang Telongjem
9. Chuchuyimlang Senso Telongjem Tuli
10. Langpangkong Watsü Telongjem
11. Mongsenyimti Village Council
12. Aokong Council, Dimapur
13. Dimapur Ao Baptist Arogo
14. Orangkong Baptist Church
15. 5 Buba Kosasanger Sungpo Zunga Chuchuyimlang
16. Dimapur Kosasanger 5 Buba Sungpo Zunga
17. Asangma Shisashir Telongjem
18. Chakpa Kaketshir Telongjem
19. Kelingmen Kaketshir Telongjem
20. Longkong Kaketshir Telongjem
21. Jangmetsulong Mepu Telongjem, Chuchuyimlang Town
22. Jangmetsulong Mepu Lanur Telongjem Chuchuyimlang Town
23. Senior Citizen Forum Chuchuyimlang Town
24. Imlang Mepu Telongjem Chuchuyimlang Town
25. Chuchuyimlang Pongener Imtilepzuk Aso
26. Medemsur, Kinunger aser temiembatem. Salema aser Tsüngremi nenok ajak Moajangma!!!

- Temiem kinungtsu,
Chirnrurtem, semchirtem,
Anukapang, kinunger aser Ashibortem.

UN General Assembly-i Palestine züngsem kumdaktsütsü ayongzüknung

New York, Monupii/May 11 (Agencies): UN General Assembly-i organisation telungzüknung Palestine indang temeden ulushitsüogo aser züngsem ka kumdaktsütsü ajungshi.

Palestine ya 2012 küm nungi non-member observer state jenjang ka nung lia aru, kong züngsem ka ama temeden kar agütsü.

Ajisüaaka UN General Assembly nung züngsem akümstü atema UN Security Council ajanga telemtetba agütsü.

Israel-i kanga sashia anema nokdakaka Hokulbarnü vote agitepba ya UN body ajanga Palestine nung buhukumba yimya ka ama ajiteter.

Palestine Tir Mahmoud Abbas-i iba pangzüng ya pelashishia agizük aser Security Council ajanga iba ken o nung ano vote agiteptsü Palestine-i merangba nung yariba ka lir ta ashi.

"Palestine-i maneni UN nung züngsem tejangja ka angütsü atema maneni meranga inyaktsü," ta pai sangdong ka nung ashi.

Israel indang ambassador to the UN, Gilad Erdan-ibo kanga mepelai UN General Assembly-i kiralongrar linük ka pei jenjang nung pelashishia agizükogo, ta ashi.

Assembly nung jembidang Erdan-i UN Charter indang copy ka anüka shisa aser züngsemtemi iba amaji inyaka vote 143-9 ajanga pangzüng agizükogo, ta tai tongloksü.

"Nenoki nenok teka agi UN charter shisar. Hao, yamaji nenoki inyaker. UN charter shisar. Aaka bitemang," ta pai ashi.

Iba pangzüng anema vote

agütsüba linükji US, Argentina, Czech Republic, Hungary, Israel, Micronesia, Nauru, Palau aser Papua New Guinea liasü. Linük 25-i iba vote nung shilem magi aser yangji UK dena liasü.

Vote magitepdang Palestinian envoy Riyadh Mansour-i General Assembly dang, "yes" vote agütsüba tetetzü ibai linük danga kata anema masü saka Palestine nung alitsü atema lir aser ibai yimjung asoshi investment lir, ta ashi.

"Onoki yimjung aginer, onoki freedom aginer," ta Mansour-i züngsemtem dang ashi.

Europe nung linük ishikati Palestine ya linük ka ama agizüktsü sentong lir ta osang kar angashiba mapang iba vote ya agitepa liasü.

Spain-i Palestine ya linük ka ama May 21 nü agizüktsü akok, ta EU foreign policy chief Josep Borrell-i Spanish broadcaster RTVE dang Brehostibarnü shia liasü. Ireland, Slovenia aser Malta linüktemia iba mera ya agütsü ta pai taoba mapang ashi saka anogobo memetetdaksü.

Hokulbarnü UN pangzüng ka renemba ya ajanga world body nung Palestine nem temeden tali agütsü, anungji o itepba nung parnoki shilem agitettsü, agenda benoktettsü aser committee balala nung par nübuwa shimtsü.

Ajisüaaka parnoki vote agütsütsü temeden bo malitsü, koba General Assembly kisüng dak iba tashi mali saka Security Council nungia mulungtsüla.

Palestine nung nem linük temoja agütsütsü ken o ya alima nung küm aika jembia arur.

1988 küm Palestine nung asoshi inyakba tetet tongtiba, Palestine Liberation Organisation (PLO) ajanga

State of Palestine amenoktsü indang sangdong mezüng agüja liasü.

UN züngsem linük 193 aliba nungi linük 139-i Palestinian statehood ya agizüka lir, saka ibai timba temaitsü ka amai dang lir.

Asangsang nungbo Palestine nung Palestinian Authority (PA) ajanga pei sasa yimsü asüba ya Israel kübok occupied West Bank shilem kar dang lir. Gaza Strip ya PA kübok liasü, saka Hamas-i 2007 nung rakzük. UN-i territory anaprong ya Israel-i amokbangba aser yimten ka dang ta züngshir.

Israel-i Palestinian statehood magizüker aser tang aliba Israel sorkari West Bank aser Gaza nung Palestine nung linük yanglutsü memulunger. Iba ama linük ya Israel asoshi timtem asütsü ta parnoki ashir.

US-i Israel den Palestinian linük temoja ka kumtettsü nungloksü, ajisüaaka iba ama linük ya anatsülen tsüngta indang-indanga jembishinüba ajanga lemettsüla ta ashir.

Taoba ita Palestine ya linük ka ama kumdaktsütsü asoshi Algeria-i pangzüng ka benokba linük aikati bhukuma liasü, saka Security Council nung permanent members pongu nungi ka ama US-i par veto amshia liasü.

Security Council indang pangzüng nung ozüng talenba lir, saka General Assembly pangzüng nung aji mali.

Israel-i October 7 nü nungi tenzüka Gaza amak tenzüker nisung 34,971 tepsetogo, aser nisung 78,641 yiruogo, ta Hamas indang health ministry ajanga ashir.

Afghanistan zümetsüng nung nisung 150 dak tema asü

Kabul, Monupii/May 11 (Agencies): Tzünglu kanga sashia aruba ajanga Afghanistan north tsütsü ajungben zümetsüng adoka nisung 153 süogo, ta Taliban indang Ministry of Interior Affairs ajanga ashi.

Honibarnü ministry indang odongtar Abdul Mateen Qani-i province asem nung nisung 138 yiru, ta ashi.

Hokulbarnü tzünglu kanga sashia aruba ajanga linük nung tesem aika nung zümetsüng adok, aser nisung asürtem timba akümstü südi ta ashir.

Taliban sorkar indang chief spokesman, Zabihullah Mujahid-i Honibarnü social media post ka nung ashiba agi, iba zümetsüng nung nisung noklang dak tema süogo aser aika yirua lir.

Linük north tsütsü Baghlan den northeast nung Badakhshan province, central Ghor aser western Herat province tem nunga kanga sashia kongshi, yangji zümetsüng agi teraksa agütsüba ya sen aika jenjang lir, ta pai ashi.

Baghlan province kisüng nunga nisung 200 dak tema asü aser ki meyirijang dak tema raksaogo, ta UN indang International Organization for Migration (IOM) ajanga Honibarnü shia liasü.

Air force ajanga nüburtem anizüker aor aser yirur alir nisung 100 dak tema military hospital balala nung anir oa anepalutar, ta Taliban Ministry of Defense ajanga Honibarnü ashi.

"Tzümetsüng agi kongshia aliba tesemtem nung state of

emergency sangdonga Ministry of National Defense-i chiyongtsü, mozü aser first aid tem nüburtem nem lema agütsü tenzüko," ta parnoki sangdong ka nung ashi.

Nisung asüba ano alitsü aser province kübok district aika nung aonung tepiyong tzünglu terara arua liasü, ta Baghlan indang natural disaster management department tekolakba, Hedayatullah Hamdard-i osangbener dang ashi.

Tawa tzünglu kanga sashia aruba ajanga ajungben zümetsüng adoktsü nüburtemi meimlai liasü, ta pai ashi.

Emergency personnel temi national army aser police nungi security forces teyari agia molushi aser ki o jen teraksa nung nisung bushir, ta Hamdard-i ashi.

April ita tiyonglen nungi Afghanistan indang province 10 nung zümetsüng agi nisung 100 shi takum samatsüogo, aser region kata jenbuwa mali ta ketdangtsürtemi ashir.

Nisung million 40 dak tema aliba Afghanistan linük nung shilem 80 dak tema aluyimba nung metaloker alir, aser alu aika tzü agi mubanga lir.

Tenem aliba province tem nunga zümetsüng ajanga rongsen jenti akoksaba lir, ta Badakhshan nung provincial director of natural disaster management, Mohammad Akram Akbari-i ashi.

Tishkan district nunga nisung aika sür alitsü, kong zümetsüng agi lenmang ka nokdanga nüburtem taolen makai lir, kong nisung 20,000 shi alir, ta pai ashi.

Kuwait yimsüsüri parliament anentsü, yimten mepetmesü nung lir

Kuwait City, Monupii/May 11 (agencies): Kuwait yimsüsüri parliament anentsü aser mapa kar parnoki benzüker ta state media ajanga ashi, koba elections agir hopta ishika lir iba osang ya angashir alitsü.

Emir Sheikh Mishal al-Ahmad al-Sabah aser chuba yimli ajanga shimba cabinet kari züngsem 50 aliba National Assembly indang tashi kar amshitsü, ta pai Hokulbarnü state television ajanga sangdonga liasü.

Pai constitution indang articles kar küm pezü tashi atema agenja liasü saka rasaa mashi.

"Tesüiba küm Kuwait nung tensa majungba ajanga state facilities timba nung ochimashi agi süngogo, aser tia maka security aser economic institutions tongogo. Iba yagi justice system nunga kongshio," ta arishi küm 83 tain yimsüsüri ashi.

"Asenoki tatok magütsütetla timtem aser tetsükdaktsü ajurua lir," ta pai ashi.
Sheikh Nawaf al-Ahmad al-

Jaber al-Sabah asüba sülen taoba küm December ita yimsüsüba mendeni atusang Sheikh Mishal kübok April ita agiba elections ya mezüngbuba liasü.

National Assembly aser cabinet tsüngta aiben mangatettep adokba mechi parliament anentsüsa akum, aser iba linük totzü nung metaloka aliba ajemtsü nükjidong nung senotsü indokba aser temelenshi bener aruba ajemtsüsa akum.

Parliament ya Hombarnü mezüng sentepstü liasü, saka yimten yimsüsüri kari sorkar nung shilem agütsü memulung.

Legislator kari pei mulungba nung yimsü sünuaba aser tejangraba aliba mechi sorkar ka kumtettsü mokoktet, ta emir-i ashi.

"Kuwait nung mapang tatsüka timtem balala ajangshia arur, aser iba yongji linük kumzüka ayutsü asoshi telemtetba agiba nung nungnanga mesüra atsüanem akatsü mapang malir," ta Sheikh Mishal-i ashi.

England nunger asayar tejen Anderson taküm asaya nungi anentsü



James Anderson

Monupii/May 11, 2024 (Agencies): England nung bowler James Anderson-i pa taküm lemluwa Test cricket asaya nungi anentsü ta jangjatsüogo.

Arishi küm 41 tain asayar ya England nunger bowler tem rongnungi wicket timtiba agiba asayar lir pai ashiba agi, West Indies den Lord's nung July 10 nü

nungi tenzuka asayatsü aliba Test ya pa atema tatembangbuba Test asayatsü asütsü.

England test team coach Brendon McCullum den sensaksemba sülen Anderson-i iba telemtetba ya agia liasü.

"Ni England atema asayaba kanga menungratsü," ta Anderson-i ashi.

"Ajisüaka ni asaya nungi

anena tangar nem maongka agütsüsü tang ya mapang shitak ta bilemer," ta pai ashi.

Anderson mezüng 2003 küm asaya tenzük aser pai Test asaya 187 nung wicket 700 agir lir, koba Test puti otsü nung pace bowler tem rongnung wicket timtiba agiba lir.

Test asaya nung wicket timtiba agiba asayartem rongnung pa Sri Lanka nung spinners Muttiah Muralitharan aser Australia nunger asayar Shane Warne na sülen tasembuba jenjang nung lir.

Pa Lancashire county nungi maneni asayatsü masayatsü mejangja.

"Ni lanuwa nungi kanga meima asayaba asaya küm 20 linük tenüng nungi janggradema asayaogo.

"Ni tajangshiba tasen ka atema aser anogotem golf tali asaya-a intoktsü yongya atar."

"Kümtem tsüngda shirnokisa kü nem teyari agütsüogo nenok ajak dang kanga pelar," ta pai ashi.

England and Wales Cricket Board mendenbuba Richard Thompson-i, English cricket-i Anderson kanga tushia asaya nungi anendaktsütsü langa lir, ta ashi.

England nunger asayartem rongnungi Anderson-i test asaya timba asayaogo aser pa alima nung Test timtiba asayartem rongnung Sachin Tendulkar sülen tanabuba jenjang nung lir.

Brazil indang Copa America squad nung Neymar mali



Neymar

Monupii/May 11, 2024 (Agencies): Brazil coach Dorival Junior-i Hokolbarnü sangdongba Brazil indang Copa America squad nung lanur asaya Endrick densema lir ajisüaka Neymar bo densema mali, shiba October ita temekok yiruba sülen tang tashi masayai arudar.

Real Madrid forwards Vinicius Junior aser Rodrygo na den FC Porto attacker Evanilson nunger ajak United States nung June 20 nungi July 14 nü tashi asayatsü aliba asayamung atema team nung züngoksemogo.

Ajisüaka Manchester United midfielder Casemiro aser defender tejen Thiago Silva, shiba season tembangba sülen

Fluminense-i meyipa aotsü, tenaprongla team nung mali.

Arishi küm 17 tain Endrick, shiba Palmeiras nungi July ita Real Madrid nung adentsü lir, pa den Girona forward Savio aser pa indang team-mate Yan Couto nata shimogo.

Arishi küm 62 tain Dorival-i, interim coach Fernando Diniz ket nungi Brazil team coach mapa taküm küm tetenzüklenang agizük, saka pa indang coaching style ya asayartemi yakta angazükttetsü ta temulung lema bilemba lemsatop.

Brazil, shirnok 2021 Copa America final nung Argentina-i tsükdakja liasü parnok taküm Group D nung Colombia, Paraguay aser Costa Rica den

ata lir.

June 24 nü asayamung metenzük tsüngda parnok Mexico aser USA den friendly asayatsü lir.

Copa America atema Brazil squad:

Goalkeepers: Alisson (Liverpool/ENG), Bento (Athletico Paranaense), Ederson (Manchester City/ENG)

Defenders: Danilo (Juventus/ITA), Yan Couto (Girona/ESP), Guilherme Arana (Atletico Mineiro), Wendell (Porto/POR), Lucas Beraldo (PSG/FRA), Eder Militao (Real Madrid/ESP), Gabriel Magalhaes (Arsenal/ENG), Marquinhos (PSG/FRA)

Midfielders: Andreas Pereira (Fulham/ENG), Bruno Guimaraes (Newcastle/ENG), Douglas Luiz (Aston Villa/ENG), Joao Gomes (Wolves/ENG), Lucas Paqueta (West Ham/ENG)

Forwards: Endrick (Palmeiras), Evanilson (Porto/POR), Gabriel Martinelli (Arsenal/ENG), Raphinha (Barcelona/ESP), Rodrygo (Real Madrid/ESP), Vinicius Junior (Real Madrid/ESP), Savio (Girona/ESP).

Nisha Dahiya-i Olympic quota 5buba ngutetogo

Monupii/May 11, 2024 (Agencies): Hokolbarnü Istanbul nung World Olympic Qualifiers asayaba mapang 68kg semifinals asaya nung Romania tsür Alexandra Anghel akokba sülen Nisha Dahiya Paris Olympics atema qualify asüba India tsür pongubula kümogo.

Tang mezüngbuba Olympics ka nung India tsür wrestler pongui shilem agütsü.

Hokolbarnü Greco-roman wrestlers trokpronglai takok mongutetba anogo ka nung lai iba takok ngutetogo.

Nisha ya World U-23 bronze medallist aser Asian Championships silver-medalist lir, aser lai semifinal nung Anghel 8-4 agi koka final-i ai aser India atema Olympic quota nguteta liasü.

Semifinal masaya tsüngda Nisha-i Belarus tsür Alina Shauchuk-i 3-0 agi koka quarterfinal-i ai.

Iba sülen arishi küm 25 tain Nisha-i Czech Republic Adela

Hanzlickova 7-4 agi koka semifinal-i ia liasü. Hanzlickova ya world number 9 aser European Championships nung medal aika ngur aliba asayar ka lir.

Tang tashi nung India tsür pezüi Olympics atema quota nguteter liasü. Antim Panghal-i taoba küm World Championships nung 53kg category nung bronze medal anguba sülen Olympics quota angu aser Vinesh Phogat (50kg), Anshu Malik (57kg) aser Reetika Hooda (76kg) nungeria March ita Bishkek, Kyrgyzstan nung Asian Olympic Qualifiers asayaba mapang quota nguteta liasü.

India nunger Greco-Roman asayartemi junga masayatet aser weight category trokprongla nung asayartem preliminary round nung tsüka liasü.

Sumit (60kg), Ashu (67kg), Vikas (77kg), Sunil Kumar (87kg), Nitesh (97kg) aser Naveen (130kg) nunger ajaki pei tata asaya mekoktet.

DC captain Pant nem asaya ka atema tenokdangba agütsü

Monupii/May 11, 2024 (Agencies): Delhi Capitals captain Rishabh Pant, Indian Premier League (IPL) nung Royal Challengers Bengaluru den asayatsü aliba asaya nung shilem magitetsü, kechiyong pa nem asaya ka atema tenokdangba agütsüogo.

Rajasthan Royals den asayaba mapang pai aniba team-i atakzükja aliba dang nung mapa tali agiba atema pa dang senchi sen lakh 30 achiba den asaya ka atema tenokdangba agütsü.

Tang agi tasembububa kasa aibelen menaba atema Pant nem asaya ka atema tenokdangba agütsüogo. Taoba mapangbo pa dang senchi dang chia liasü.

IPL sangdong ka ajanga ashiba agi, "Pant-i aniba team-i Rajasthan Royals den May 7 nü Arun Jaitley Stadium, Delhi nung asayaba mapang atakzükja aliba mapang dang nungi tali agia IPL Code of Conduct nung aibelenba atema Delhi Capitals Captain Rishabh Pant dang senchi chiogo aser pa asaya ka atema tenokdangba agütsüogo."

"Iba ya par team asoshi tasembuba aibelen asünung minimum over-rate offences dak sendakba nung IPL's Code of Conduct dak ajemdaker Rishabh Pant dang senchi sen



Rishabh Pant

lakh 30 achiba den, pa asaya ka atema tenokdangba agütsüogo. Iba den bendenloksema Impact Player densema asayar ajak dang parnok indang match fees shilem 50 (lakh 12) senchi chiogo," ta kasa sangdong ajanga metetdaksü.

IPL Code of Conduct Article 18 dak ajemdaker Match Referee-i obendang agütsübdak sendakba nung Delhi Capitals-i temepeshiba ka agütsüogo. Iba temepeshiba ya review atema BCCI Ombudsman dak sendaka lir.

Taoba Mongolbarnü Rajasthan Royals den asayaba mapang Delhi Capitals-i run 20 agi asaya koka playoff-i aitsü atema timla agütsü liasü.

BILEMDANGANG

"Ochishiba aser tamang katetbaji nü sobutsü kumdakjang."